

# ألبوم رمضان

شعر  
نجوى السيد



هيئة النيل العربية للنشر والتوزيع

٤٢ ش جول جمال - المهندسين - الجيزة - ج.م.ع

تليفاكس: ٢٠٣٦٢٠١ موبايل: ٠١٢/٢٢٢٨٧٢٤

e-mail: hebanile@hotmail.com

٢٠٠٧



## مدخل

رمضان  
عجّز ، وفانوسه  
أبو شمعو وبهجه  
بتزقطط جوه قلوب الكل  
من لحظة ما هلاله بيهل  
ولحد العيد ما يطل  
دفنوه ، حي وبفلقص  
واتفتنوا في الفوانيس ، علشان الزفه  
لا كن رمضان  
ما رجعش عريس  
عجّز ..

واكتفى بالفرجه على الألبوم  
(٣)

أصل الألبوم  
بيعيد له الذكرى الدافيه  
يوم ، ورا يوم  
الحاره ، والجاره ، واللمه والدرأويش  
أطفال ، من عشره حلال  
أفراحهم طاهره  
بيقولوا : إدونا العاده  
والكل بيدى ولا يبيخل  
من وسط الكُل  
بيطل  
رمضان فرحان  
يطمن قلبه على التنايس  
يلبس توبه المتدندش  
بالزينه ف كل مكان  
ويطوف حواليه الكُل  
من لحظة ما هلاله يهل

يتسابقوا الكتاكيت النُّعَّة بالفوانيس

متشعبته في صوابع نونو

وساعات

تشاقي الشمعات

تعلی بنورها ، وتطول إيد الكتاكيت

الكتاكيت تصرُخ

ترمی فانوسها

بابا یقرَّب ويطبطب

یاخذُ إیدها یوسها

تضحك وقملل م الفرحة

ترقص كل نجوم الليل ، وتميل

یتبسم رمضان ویهم

ویقوم

یطوی الألبوم

یوم ورا یوم

إیه ؟

يا شهر الصوم  
إوعى تعجّز ، واوعى تكل  
جوه قلوبنا لسه بذور الخير مبدوره  
مهما نشوف ، من شر وغل  
إيدنا فى إيدك  
ننزل على راس الخائنين بالشوم  
مد الذكرى يا شهر الصوم  
وافضل دايما أحلى عريس  
إوعى تعجّز  
حتى  
لو عَدَمُوا الفوانيس.

## رمضان زعلان

رمضان ، زعلان  
ماحدّش أخذه بالأحضان  
ساعة ما هّل وقال : مشتاق  
الناس ،  
زهقانه ومخنوقه وهيانه  
(إيه جرى للناس) ؟!  
بيكلم نفسه ونفسه يفوز بجواب  
خايف ليكون  
لخبط في معاده وف العنوان  
فين الأفراح في عيون الكل؟  
ليه كتبت أتواب الأحران؟

والصوت مهدود همدان

يتمنى يصيح

ويجلجل زى زمان

لا كين حيسمَّ مين؟

رمضان ، جاي شايلى مش طالب

إحسان -

شاف ناس ، محتاجه للحجَّاج

وقليل محتاج ابن الخطاب

قال مين ، يضايبنى ثلاثين يوم

مين اللى عن وجبات الشر

حيتوب ، ويصوم؟

أخدوه بالحضن

زهاد فى الدنيا .. وم الخالق خايفين

وقالوله اتفضل ، مهما بيحصل

فى طريقنا تلقانا ماشيين

الكلمه ما نقسمهاش اتنين



واللقمه تتقسّم ع الكل

ومنين ما قهل

إن كان للعمر بقيه حنستى وما نكل

تغسل بقدومك أى غُبار

يا أهل الدار

رمضان، للكل أمان

وان كان اللى بيغويننا شيطان

نطلب له الخلع

لا بد

نتطهر جوه بحور الدمع

وان كان حوالينا الدُخان

فى كل مكان

خلانا نتسحر بعد الرفع

وختمنا صلاتنا بالوتر

ثم الشفع

يبقى طريقنا آخره سد

ومدام جوانا اهد  
ما نلوم على حد  
لو فكر يملك روحنا في يوم  
وبوضع اليد.

## رمضان كريم

مدخل :

إصحى يا نائم

وحد الدائم

رمضان كريم

إصحى يا نائم

الخطر هاجم

خصمك لنيم

.. .. ..

إصحى يا نائم قوم خاصم النوم

إلى بيسالم راح تركبه كل الهموم

إشتريت خصمك

يَعْتُ لَهُ حَقُّكَ  
وفرشت له رملك  
وعزمت له المزاويك  
ورقصت له في لقاءه  
إنذار يحضّر سيوفه  
واندرت تعزم ضيوفه  
وتطاطى لما تشوفه  
وتقبض المعلوم  
ياللى فى بحر من العسل بتعوم  
والكل من حواليك  
ينكّ فى زلعة مش  
خصمك حالفلك يلاعبك  
حتى يقولك كيش  
ومدام انت تغش  
راح يغل الصبر  
والغل لازم يفش

رسمت حلمك بالسحاب أعوام

ونمت لما سالت

والخصم صاحي ما نام

إصحى يا نائم

وحد الدائم

رمضان كريم.

## مهر النصر

ح اجيكم مهما قولتولى : (كفايه عليك  
وروح ارتاح وريحنا  
عاجينا يا أخى نبقى كده إحنا  
وانت .. كل ما تيجى بتجرحنا)  
أنا رمضان..  
ودورى أسلسل الشيطان  
وأبدُر أرضكم بالخير  
واعرّفكم وصلتوا لفين  
وارجّعكم، إذا لخبطوا فى السكّه  
وكونتو فى الطريق تايهين  
أرجعكو

قلوبكو بالندم تنبض  
وعن كل اللي ندّمكم  
تقولوا : إنكم تايين

... ..

أنا رمضان ..  
وجاي لجلن أكسبكم  
واطالبكم  
بكل اللي يوصلكم  
لجنه فيها أحلامكم  
ما نش طالب لنفسى شئ  
ده رب العزه كرّمكم  
وأبواب السما مفتوحه علشانكم  
ومنكم  
إللى ربه هداه  
ومنكم ، إللى توّهكم  
أنا رمضان

لا عُمرى أنهزم مهما الشيطان يعمل  
ويتشطرَّ

ولا عُمرى بقدره ربنا أكفر

وكل هزيمة لما نفوق حتتغير

ومهر النصر يتدبر

مادمنا ويا رب الكون

إرادته هي إلی تكون

وقوله كله دائما صدق

وعين الحق

ولما أنزل القرآن

تولى حفظه سبحانه

من الشيطان وأعوانه

وانا شاهد

على اللى عبّوا نبضاتهم بحب الله

وانا شاهد

على اللى عبّوا نبضاتهم جحود لله (١٦)



ح اچیکم مهما قولتولی : کفایه علیک

وربی یعین

ونبدر فی بذور الخیر

ونجی

منها فدادین.

إعتكاف

جوه مسجد حُزنى قضيت السنين

إعتكفت

واداريت

عن عيون الحاسدين

كل ما ارفع رايه عاليه

الحجر بتشقه دائما ألف عين

لما هل هلال صيام الشهر قاللى

المعوذتين ما تنسى

واستعيني بالمعين

يا سنين، إعتكافى

م العلل ..

إلرب شافى

يا رصيد صبرى .. اللى باقى ليّا منك

ياترى حيقضى مشوارى اللى باقى ؟

جوه مسجد حُزنى كات دائماً (١٨)

صلاتي

دمع يغسل كل آيات الدُعا

اعتكفت،

وإداريت

خدي شهر الصوم ووصلني

لباب البدر تاني

نبضى راح يسمع أغاني

لابسه توب الفرّح وف إيدها الشموع

كلهم متجهزين مستنيين

راح يزفوا الشمس في لحظة طلوع

بعد ما اعتكفتْ وغرقت

في الدموع

واما جه وآن الآوان

كلنا سمعنا الأذان

كلنا لبينا في لحظة النداء

وانتهى كل اعتكاف.

## من السنّة وم القرآن

وجه رمضان  
جرت فاطمه وأبله حنان  
يفكّوا تانية الفستان  
ويتباهوا بطول الكم  
وغطّى شعورهم الزبده  
إيشارب مصممه فنان  
وقالوا : تحرم الزينه ، بطول الشهر  
وبعد الشهر تعدل  
وجابوا فتوى تنصفهم  
وفتوى تحلل الدخان، فهار الصوم  
وادينا ضربنا كف بكف

وامتى الجهل راح ينصف  
وامتى العلم يتكتف  
وصوئه ينخرس قدام لسان الجهل  
سلاح العلم دايمًا ينتصر  
وهزيمته مش بالسهل  
وانا وانت مادمنا أهل  
حتتصافى ويهدينا الكلام الزين  
وشوف احنا وصلنا لفين  
وايه اللي مسيرنا بكره نوصل له  
ما جاش رمضان  
وزارنا بعد عام م الغيبه والغربه  
عشان إحنا نطبّل له  
وبالمزامير نزمّر له  
وفيديو كليب نقدّم له  
غنا ورقصات عشان خاطره  
وهيصه ويا أول لقمه بتعدى

(٢١)

ونبلعها  
ويتفنن أهالي الفن في دلعها  
ويتباروا  
عشان المسجد العامر ، ما يعمرشى  
ويبقى الكل متسمر  
يشاهدهم ولا يمشى  
مدارس كلها نايمة ، عشان صايمة  
برامج عاقده كل العزم  
تحارب في الفضيله أو تموتها.

... ..

ماجاش رمضان  
عشان الطبل ويا الزمر  
يعلّى جل ما يغطى على التراويح  
ماجاش إلا  
عشان يدينا م القوه

ما يجعلنا  
جبال ما قد هاش الريح  
قلوب جوه الجبال تنبض  
باسم الله  
وتتمنى تنول بعد الهداية رضاه  
لا بد نخاصم الهيصه ونتمعن  
فى كل كلام  
قراه رمضان  
من السنه  
وم القرآن.

## إيه جديد؟

مدخل :

يا حبيبتى يا مصر يا مصر

يا حبيبتى يا مصر يا مصر

.. .. .

كان مخيلك ده كله فين؟

نفسى أقرى مره فى الجرائن

سطر يفرح قلبى ويهدى الأنين

كان مخيلك ده كله فين؟

حتى فى رمضان !!

الحكاوى مش حكاوى ألف ليله

الحكاوى جوه بيت الرعب دايما ..



القتيل والقتيله  
واللى خابلاه الجميله  
واللى إيده مش ثقيله  
واللى بتطالبه الضرايب  
واما ما قدرشى ، بتحجز ع البليه  
واللى عى البنك فى عبّه وطار  
واللى باع الدار ورحّب بالتار  
واللى متخصص فى ألوان الهوان  
جوه جرنان المآسى  
المدارس تشتكى فقر الكراسى  
واللى مالى كرشه ناسى  
واللى بيدور على شغلانه والحظ يراضيه  
مش ضرورى هىّ إيه  
واللى حظه بيعاديه  
(٢٥)

واللى فاكر نفسه إيه  
واللى بيه  
بس كثر له الزمان  
التخصص : فلسفه شعبية كرامه  
والعمل مطلوب له خبره  
لجل ما يشيل القمامه  
والأمان جوه الحدود  
مش أمان  
ينطلق قلب اللي يانس م الزمان  
يرمى نفسه ويرمى يأسه  
لجل ياخذّه الموج ويجرى  
حلّمه إنه يبقى شئ  
قلبه غصن عنه وسط الموج جرى  
مركب الهم اللي شالت  
لما مالت

راح ووياه اللي راحوا

والجرى راجع غريق

جوه صفحات الجرايد

قالوا عنه لما راح

راح قتيل

مش شهيد

ايه جديد

ايه جديد.

## مکتوب

حَمَّال ...

والحال مش عال

له أَلَف سؤال

واهو كله على الله ياخال

بيعلم صبرُه إزاي ما يضح

واهو رغم ده كله ساعات

بيهج

من صبرُه وطول البال

ويقول :

أهو يوم بيمر

وكم ان يبجر

العُمر وراه

وان كنت عليه ، أو كنت معاه

أنا دائما باترجاه

إن كانت عِللى

لها دوا وياه

يحضر ويجيبه معاه

ودعاه، فى العصر

ودعاه ، فى الفجر

وف كل صلاه

إزاي لساها ما وصلش ..

ساعة ما باطل بقلبي عليه،

يتعصر قلبي عصر

يتحسر كاسى المر

ويقول :

اللى متشطّر دائما

ليه ياخذ صفر ؟

واللى وياه الدرجات : عبد المأمور

عين المأمور

مليانه تملى شر

لا همهُ صيام رمضان

ولا بتهمهُ تراويح

ويقول للخير إنجر

يا دمعى

إياك قهرت وتفتر

مش عايزه عيون التماثيل

تلج في عيني القهر

وأدينى قفشت السر

القلب الضلمه ، تملى يقر

(إكفيننا يارب الشر)

واللى وياه الحق

بيعارك دائماً أمواج الشريك

وشجاعته ساعات، تغلبها الكُتره. (٣٠)

دائما بيدور على بكره  
طيب ، له قلب نهار  
ما في هوش أشرار  
ييجى ويجيله قوس النصر  
من بعد النصر ما قال : يافرار  
واهو لما اتأخر  
القلق اتفجّر  
أخده واتمشى لحد بيان الستر  
وحبس فى عيونه دموع الصبر  
دندنله نبضه المغلوب  
(مكتوب ..  
ولا فيش منه مهروب،  
مكتوب ..  
ولا فيش منه مهروب  
مكتوب..)

## تمائيل العرفان

إتفضل إكتب يا رمضان  
إتفضل إحسب يا رمضان ..  
كام واحد من خنقته هربان  
وأديه طفشان  
لبلاد الجان  
لا حيلته حصان ، حيشيله لحد هناك  
ولا أرنب يركبه ويعدّي  
لفلف قهره  
في همّه ورماه ورا ضهره  
ودّع شِعْره ، ببحور الآه  
وابتدا في قصة ؛ كان ياما كان

.. .. .



فين الأوطان

إلى بتلملم كرم اللحم

وبرمش عينيها بتغطيه

بحنان النبض وبتدفيه

وان راح ، بتصلى عليه

وتقيم له تماثيل العرفان ؟

... ..

إتفضل إكتب يا رمضان

إتفضل إحسب يا رمضان

كام واحد هج

كام واحد ضج

كام واحد كره الشمس

واشتاق لبلاد التلج

رمى نفسه ف حضن البحر

والبحر ما بيطقش الأمواج

ساعة ما يفيض بيه الزهقان

إتفضل إشهد يا رمضان  
كام واحد راح  
كام مره البحر يبيلعهم  
كل اللي الحظ يبيلعهم  
ولا خط الكف مطمئهم  
ولا راحة بال  
بتبدّل حال  
ولا حد بيفهم في الفنجال  
الكل طلع دجال  
والحلم المرسوم ، في اللوحه خيال  
ألوانه محال  
وقتل ، نكره القتال  
والحارس سرق المال  
ودفن مفتاح القفل  
والتل اختل

وإتبدل لون الفل  
في قلب الكل  
وغيطان ، تندب موت النوار  
إتبدل عيد القمح بعيد الحب  
والقمح يداوى كُفر الجوع  
والحب ما يسكن عش الغلب  
بيهون الصعب  
ساعة ما تشيل ويايا الحمل  
اللى متعبي ف قفف الصبر

... ..

ويحلى المر  
والمركب بتقرّب بينا من البر  
حرقوا أقواس النصر  
وانداروا ينفوا الفجر  
الخير ، تمّنه الأرواح  
والشر أديه ببلاش

والجاني ما يبهداش

دايما قلقان.

... ..

إتفضل إحكى يا رمضان

فِر الصفحات ، وارجع لزمان

صحى الحكايات

وابعتها على العنوان

دى العتمة اللي متعصب

بيها الحق

لابد تزول

واهو كل أدان ، بأوان

والنصر ماهواش بالمجان

النصر

ماهواش بالمجان.

## واڤكى يا واد

واڤكى يا واد  
حكايتك زى حكايات الجميع غيرك  
بلادك ماعادتش بلاد  
تجيبلك زاد ولا زوآد  
ما قصرتش فى أحلامك  
ولا قصرت فى المشوار  
وجيش كوابيس هديتهولك بلادك  
عشان ما تمج فى منامك  
ولو حتموت خلاص م الجوع  
مهو كل البشر حتموت  
(٣٧)

ولو حتضيع من التوهان

حيفضى مكان

وتتحل - إن خلصت انت وغيرك -

أزمة السُكَّان

لا تبكى همّ حكاياتك

ولا تنده على يأسك ، يشنّقلك

حياتك يوم

أكيد مظلوم ، وربك ينصرك بكره

إذا .. حنيت لصوت الصبر

إذا .. ما فُتّ مركب رحلتك تغرق

وراضيتها ، لحد البر.

... ..

ياواد عافر ، ولا تسلم

ومهما نبضك اتألم

ما ترحل ، أو تفوت الأرض

بنينا المجد

وإن كان البُنا إقْد  
نعيْده تاني ياللا يا واد  
ويا لالا استهدى يا حزنان  
ومن رمضان إلى رمضان  
تداوى قلبك القهران  
وتتحدى المحال دائما بطول البال  
دى لقمه حلال  
تاكلها وانت فى أرضك  
تساوى كل مال قارون  
فى أرض الغير  
بلادك هى سر الخير  
  
وإن كانت فى محنه :  
إلسيب إحنا  
ساعدھا يا واد  
تقوم م الكبوه ونكمّل

وإن طَوَّلَ  
كابوس النوم  
مسير النوم  
ما حيَّطَوَّلَ.



## موائد الرحمن

أنا اللي للتعب بارتاح  
وتقلقني عيون الراحه لو طَلَّت  
سألني بليلي الصداح  
على اللي بيسرق الأفراح  
إذا هِلْتُ  
جمعت قصايد المشوار  
وَقُلْتُ اختار  
لَقِيَّتُهُ احتار  
وجاب قلمُه  
وفوق صفحات بتتَحَضَّرُ عشان تَنْعَسُ  
قلقها بالقلم قالتله : لو تخرس

فضل يجرى على سطورها

ويشكيلها

لحد ما طار خلاص النوم

وتأني صحصحت عينها

وخلصت صفحه ورا صفحه

وقلب البلبل المقفول

على اللي بيه

فتح بابُه

وخرَج كُلُّ أحبابه

وضايفهم على الصفحات.

... ..

جريت وقريت

وفسَّرت الخطوط اللي بتكلم وتتألم

لإمته علة الأحزان

ما تتداوى؟

وقبل ما اطيَّبْ

يجبني طيب  
يقوللى إرمى أحمالك على اللى يعين  
وقيمى موائد الرحمن  
عشان نبضك كده مسكين  
وحاولى تطعميه فرحه  
وراحة بال  
قيميله موائد الرحمن، بطول العمر  
وإوعى تكتفى بالشهر  
موائد رحمه للنبضات  
يباركها  
ويزعل م اللى تاركها  
أكيد رمضان.

## عُمرَة رمضان

سامحت الحزن لما وعدني  
راح يبعثلي يوم الفرح  
لكن حُزني، ما وقي القول  
في بحر همومي كانت مركبي شاردة  
وشقه البحر عرض وطول  
تدور ليها على مرسى  
واهي لسه  
بيعلى الموج يشتها  
ويهدى  
تبص له في ذهول  
وليه الحزن مش صادق  
وليه يوعد  
وليه يعمل كمان مشغول

ماهش هاین علیه یعتقنی

لو ثانیه

أهَرَّبَ فرحة الدنيا

واغَيَّرَ موضة الأحران؟

غُلِبْتَ ولما فاض بيَّ

نويت العُمرة في رمضان

وفعلا كل شيء بأوان

ورحت وجيت

دعيت ودعيت،

يقدرني إله الكون

أصوم عن حُزني وكفايه

شربت اللى شربته كاسات

وإمته

أشرب الشرابات

ولو مره،

في كُبايه.

## التوبه

يعين الله  
على الشده يقويننا  
ولا بينام ولا يغفل ويهدينا  
وكل ما نفتقر بنقله يغينا  
يقول نادونى وننادى  
يجاوننا ويسمعنا  
لانه قريب ، فى ساعه ما النداء يخرج  
من النبضات  
وله اوقات  
يلبى فيها مطالبنا ، وأمانينا  
.. .. ..

ومن خوفى من الضلمه وم العتمه  
ناديته ينور السكه  
ناديته يهدى نبضاتى  
ويجعل فى كلامى لى حَتَقُه الظلم  
شهادة حق  
ويقبل منى لو أخطأ  
دُعَا التوبه  
ويغسلنى من الذنب اللى يَفْقِس ذنب  
أقول يارب  
ما يخرلى  
أحبُه قد ما أقدر  
ولا أخجل  
وأعلن إن دنيانا وانا وياه  
تكون أجمل  
وأندم ع اللى راح منى  
بدون ما أكون كما يبغي  
(٤٧)

سعادتی فی رضاه ، لو یرضی

ویسامح

ولو یغفر حاجات فاتت مع امبارح

وخلیتی أقول ازای

رضیت بیها

وشوفت ساعتها بعنیها

وأحمد ربنا الرحمن

بأنه بعث لنا رمضان

فانوس ف إدیة

وبدر ، الفرحة ساكنه عنیه

ولیل وئاس

تخشه الناس

عشان تغسل ذنوب النبض

وتوفی الوعد

ونتمنی

تكون التوبه دی نصوحه



تداوى كل نبضة قلب مجروحه

يهل العيد

معاه أفراح يوزعها

نقوله هديه مقبوله

ولا يمكن نرجعها

ونتمنى يطول العمر

جل نلقى بالأحضان

هلال رمضان.

(إلى زميلة الدراسة بالمرحلة الثانوية)  
فضية حسين شعث الفلسطينية)

### فدائية

ما نش ناسياها ، فضيّه  
وحكاياها  
عن الأرض اللي محظيه  
فلسطين اللي جابتها  
وخلتها  
تقول ليّ  
ياريت اصبح فدائيه  
مهو أخويا كده ومعاه

ولاد الأرض (٥٠)

بنتمنى نحرر قدسنا م الأسر

وروحنا لجلها هديه

.. . . . .

وكناف حصه الألعاب بنتحجج

نقول للأبله سامحينا

وعافينا

عشان لينا

ظروف خاصه كده بينا

وما نصدق

تفوتنا لجل ما نبدي

حكاياتنا

وكنت اسمع لفضيه

بدون ما أهيمس

كلامها كله ييفجر

فى قلبى النار

يقيد النار ولا تطفى

بتعقد في الحواجب كل ما تحكى  
ونبضى م الألم ييكى  
وهى ترتجف وعيونها لم تبكى  
تقول لى دا البكا يلزمه بحر دموع  
وانا خلصته من بدرى  
بوضع اليد ملكوا الدار  
فريق أشرار  
تراب الأرض ما يسامح  
ولا يصلح  
غريب كدّب صكوك الأرض  
غرقنا فى بحور حكايات  
كرهنا صوت جرس غاوى ينبهنا  
يخرجنا  
من الحرب اللى جوانا.

... ..

وجه رمضان

لقينا صوته ويانا

بيشهد إنا على حق

وفضيه

قضيه لسه منسيه

وفين هي

بيبان المدرسه نامت

ولما صحيت اليبيان

لقيت فضيه ركبت مركب التوهان

وما عرفتش لها عنوان

وهذوا ملعب الألعاب

وكانت بدھا

تتملى من ركن الحكاوى وتبدر دمعها

عنى

ورحلت فجأه فضيه

لفين رحلت

وفين هي

زرعها أخوها جوه الأرض فدائيه  
وراحوا لجل عرض الأرض  
ده ولا لسه فيها الروح  
ورضيت تقبل الديّه.

## الحكاية

كل ما تتمنى جاهلًا بالشحاته  
واللى فايض م الهوانم  
كل ما تلبس وتخلع  
تلتقى ويا المراه  
يبتدى صوت الحكايه  
ويعلى صوتها بالسؤال  
طب وليه؟  
انقص ايه؟  
جل أصبح ست هانم  
جل يبقى جوزى بيه  
بكره حظى المستخى

لما يظهر

مش ح أدور

ع اللى باحلم بيه وافكر

بكره مصباحى يقول شَيْبِك تعالى

بكره أرمى للهوانم

- حتى لو ضيعت مالى -

إلى حيز غلل عينيهم

بُكره أقدر أشتريهم

والزكاه

قبل عيد الفطر أتمنى ما اخدها

بِدَى أَدَى

بس يَدَى

لسه بتفتش على مركب تعدّى

فيها كنز

كنز زاح يجي لحدّى

أشتريه بكل التحدى



مركب الصدفة اللي بكرة حترسى عندي  
راح تشوف في عنيا عندي  
لما تطلب مني أرضي :  
أنسى كنز من الذهب واقل بفضه  
وان سكن طمعي ف عيوني  
أعذروني

الهوام ، علموني  
عيني دائما تبقى تحت  
لما يدؤوا واما آخذ  
واللي باحلهم بيه  
ده حقي مش جنان  
اللي مالك رزقنا  
بكرة يفرج عننا  
ننطلق

من زنازين فقرنا  
غملى بالمال كفنا

جل ندّى مهما ندى  
نلقى مالنا فوق جمالنا  
كل ما ينقص يزيد  
يتملى عبّ الخزائن من جديد  
أدّى وارمى للهوانم  
وأمر اللى ساكنه فوق  
ما تفتّح عينها فى  
وان نست مره أحذرها  
ما تنسى مره تانيه  
يجى شهر الصوم وانا عندى وعندي  
كل يوم ادى وأدى  
والزكاه قبل الصلاه  
برده أخرجها بيدى  
جل افك العقده من حبل الشحاته  
والشماته

إلى كتفى سنين (٥٨)

جلل یرتاح جلدی یوم  
لما یلمس توب ما جرّب جلد غیری  
قبل منی  
إمتی یارب تحقّق لی حلمی  
بعد ما قلت الحکایه.

## الغربه فى رمضان

وخذتنا الغربه فى رمضان

مره فى بلاد الضاد

مره فى بلاد البرانيط

فى بلاد الضاد

الرزق يغطى الدين

والرزق تملئ نوعين

دائما نختاره حلال

دائما راضيين

بالقسمه وبالمكتوب

واما أخذتنا الغربه هناك

فى بلاد التلج

كنا بنرسم حواديت

نقراها على وش الأسفلت  
تحت المطر الغضبان  
لحظة ما النبض يتكتك م الخوف  
ع الولد  
اللى ساكناه ، العله وكل مناه  
يلقى فى الغربه شفاه  
أخذتنا الغربه هناك،  
سلمنا أمرنا لله  
وصيامنا كان دائما مُعاناه  
فى عز الحر  
وف عز الثلج  
لا كن للصوم بركات  
فلفصنا من الغربه وغلبنا الرحلات  
وهربنا وقولناها يا فكيك  
واهو ربنا أكرمنا  
فى الرزق وف الولد

واهو رغم الغربه القاسيه  
إلى ماهاش فى طول الفرح  
إتلم الجرح  
سجلنا كل الحواديت  
فى كتاب الذكرى سطر بسطر  
وبعتنا لبكره لجل نوصيه  
ما يقلب فى الحواديت قدامنا  
ولا ليله يعيها جوه الكوايس  
وان لحظه رمالنا سؤال  
ولقانا اتلجمنا  
يعرف إننا بنفصل فى توب النسيان  
علشان ، ما نكشر لو زارنا رمضان  
ونغنى لما يجينا العيد.

## هَمَّ الناس

ليه كل هَمَّ يهم  
القائى فى صفه  
ومهما أقول اعاديه  
أجريه وأضايفه  
ليلى نهارى  
أنشغل بالهم  
إلى مالكنى، واللى ملك الغير  
سيفه يطير فى رقاب  
نبض الفرخ لو هل  
وازاي افوته فوق كتاف الناس  
ولا اقولهم عنكم

قدرى ، مانش باقدر

لما أصوم وافطر  
أعدى لقمه قبل ما اطمئن  
على بطون الخلق  
يا مصري  
ياللى ع الجبين مكتوب  
ليه قلبى مش زى القلوب  
ليه مش بيدى  
أنشغل بى ، ولا شويه  
ما باختلف طول الزمان  
صاحبت هم الناس  
فى صبحى ومسايا  
حذفوه على كتافى  
أنا قلت هاتوا كمان  
من قبل شهر الصوم  
وبطول صيام رمضان.



بطول أو عرض يا سيني

وعديتي

و كنت بترضى أحلامي

وعن أحلامي ما رضى

أدحرج فى كرات دمي

تصيب همي

لكنه بيصحى من تانى

وتانى جه وصحائى

ووصائى، أبيع النوم

وعنه أصوم

مدام العمر بيسافر قوام ويروح

وقفت وشوفت أحلامى بتتحرك  
وتتكلم وبتداوى فراق العمر  
نقشت فى توب ليالى الهم وش البدر  
حدفت الزهر

وما اهتميت

مشيت فى سكتى ونسيت

وصايا الهم

وفجأة شوفت فى الجرنان

كلام قولته

بنيت أبياته من نبضى

ولا خبيته ولا شيلته

ملانى باللى خلانى

أعانى ، حتى أطلقته

كلام رجّع سنين فرّت

خدقها مركب النسيان

بيحكى ذكريات رمضان

وليه الصوم بعيد عنه بدون فرحه  
وليه الأكل نفس الأكل قبله وبعده  
ناقصه حاجات  
بتعمل إيه يا شهر الصوم  
تغير شكل ديتنا  
أكيد الفضل يرجعك فى امتنا  
وإيه قبلك وإيه بعدك مشتتنا  
بتعمل إيه يا شهر الصوم  
ياريتك تبقى طول العام  
وتمضى العقد ويانا  
سنين قدام.

## تاريخ الهزيمة

هزمتيني  
يا زهره وسط بساتيني  
في لحظة ما بديتي تفتّحي، ورفضتي  
تحرّسك عيني  
وكان رمضان ، تاريخ رفضك  
داديتك قد ما داديتك  
وبالقلق اللي ساكني  
حاوطتك حتى ضميتك  
ونبضك كان بيتكلم مع نبضي  
ولما يجري انا اهدّي  
وتعلي منه أنفاسه

عشان نبضی علیه طبطب  
وقرّب له كده وباسه  
ده کُل ما فيكى يازهره أمل بكره  
وصابك سهم عين الشر  
ورمضان م المطار خارج  
وكنا كلنا قاعدين له جنب الباب  
وكنت إنتى فايتانا  
وسرحانه  
فى عالم منه آه يانا  
فاتوسك كل عام بنحب نسמעله  
ودى المره  
ما فضيناله  
عشان تايهين ، معاكى ولسه مش  
عارفين ولا فاهمين  
بياه نداويكى م التوهه

وامته تسكنى تانى فى ننى العين  
كما كنتى  
ودلوقتى ، هجرتى الننى وهاجرتى  
لحلم مخيف  
زرعتك فى الربيع ودعيت ما يخلصنى  
رفضتى تسمعى حسى  
وانا خوفى  
يحيكى خريف ، يدبّل أحلى ما فيكى  
جناحينى  
حنان قلقان يديكى ويحميكى  
إيه اللى يارموش العين يداويكى  
فراشات نبض قلبى أو كرات دمي  
قوليلى لجل اهاديكى  
واشوفك تانى جاياى  
وفرحانه بقدوم رمضان

وحواديت الألم نداويها بالنسيان

ولا أشهد

بانك يوم هزمتني

وتاريخ الهزيمة

إبتدا ف رمضان.

## أما قلت !! !!

لما كنت بمريله وفيونكه ساكنه في الضفيره  
كنت فاكراه ابي أميره  
راح تفك رموز حجر بكره جديد  
وهاديه لمتحف رشيد  
كنت باتكلم بألف لسان واقول  
واما قلت  
وانطلقت  
قالوا قولي .. ما هو قولي  
إفتخرت  
اما رحت البيت عرفت  
إن والدي نابه نايب



م الأعادى والحبايب  
والجميع وصوه علىّ  
والكلام أصبح قضيه  
إيه الجريمة  
قلت يومها السد خير  
بس إيذه فيها شر  
للأهالى الصيادين  
لما يفضى النيل من السردين قولولى  
يكسبوا بكره متين  
والدى أقسم ميت يمين  
إنه ما يدبني فرصه للكلام  
بعد ما اخلص علام  
لما بُحت بسر حلمى  
وقلت بدّى  
بكره صورتى ويا إسمى فى الجرايد  
تبقى هى ثمره واحد  
(٧٣)

وابقى صوت صاحب رساله

إما يعلى ، أو يقدم استقاله.

... ..

الف رحمه عليك ياوالدى

نبض قلبى بيناديك

كل ما اتذكر عنيك

إسمك السيد وشهر الصوم عطاك

إسمه للشهره جرى الكل وناداك

(يا رمضان .. يا رمضان.)

ميلادك .. مش دموع شمععات

ميلادك كان  
مع بدر ف سما رمضان  
تساوى الدنيا إيه ساعتها لو ساوت  
ما شئ أحلى ولا أغلى  
من الطله فى وشك  
إلى رسمه البدر  
ميلادك كان، فى شهر النصر  
وكانت بشرى خير للكُل  
وبادعيلك،  
يكون النصر دايما فى قدم خيلك  
ومهما يلف ،

يرجع تانى ويحملك

... ..

ميلادك

مش دموع شمعات ولا تورتات

ميلادك صفحه من صفحات

تاريخ محفور

سطور من نور

واهو اتحقق قدوم الحلم فى رمضان

وكل ميعاد

لتورته وشمع راح ينقاد

بنسجد شكر ع النعمه

ونتذكر

سنين مرّت واهى عدّت

وادينا كل ما بتفوت

بتكبر إنت وبتلبس

زهور النصر

وانا في كل صلواتي  
با عيِّ دُعَايا في نبضي  
واقمناه  
يعيِّ أمنيّات قلبي  
ويطلقها  
لأبواب السما  
وتنفوت.

## ليلة القدر

قدمى اللى كانت  
ما يفوقها سباق  
كتفها حبل الداء  
يا ربنا يا معين  
الصبر آخره فين  
خبط على بابي  
رمضان ، وجابلي فانوس  
نور لى بيه  
سكه لأحلامي  
من بعد ما غلبتني كل أيامي  
وتوهتلى البدر والنجمات

وانا كنت دائما  
أتلهف ع البدر  
واما يغيب  
أنقدر له أجمل ندر  
وأوفى عشان خاطره  
وتقدرت مره وأتلهيت ونسيت  
البدر تاه  
وأخذ نجومه معاه  
وانا شربت الصبر  
واما افكرت الندر  
جريت أوفى  
ما قدرت أوفى من عللى  
ولما خبط على بابى وجه رمضان  
أنا بُحت له بألى  
وسألته فين البدر  
طمنى قال راجع

والرب حيعينك  
وراح توفى الندر  
وصاني ما اتوقف  
بدعايه ليلة القدر  
وفات في إيدي فانوس  
وفات في قلبي شمس  
وطرد ساعتها كابوس  
قال ان حظي نحس  
يا ندرى يا منسى  
ح اوفيك عشان أمشى  
واجرى  
في كل سباق.



## الكنافه والقطايف

وكنام الكنافه والقطايف  
نحشى فى بطونا  
ولا سكر ييقلقنا  
ولا ترعبنا سيرة ضغط  
ولف الوقت  
بقينا بس نتفرج  
عليهم لو بدا رمضان  
فى وسط اللمة فرب من ملامحهم  
واذا نسينا فى لحظة ضعف  
وحاولنا نصلحهم  
يزورنا الداء  
يحاسبنا ، يعاتبنا

نُطْلُ فِي وَشْهَمٍ وَنَقُولُ :

(كَدَهُ ، اللَّهُ يَسَامَحُكُمْ)

بَقِينَا وَالْخِشَافُ وَيَا الْكِنَافَةَ وَالْقَطَايِفَ

وَالْقَمَرَ أَعْدَاءَ

وَاهِي أَرْزَاقَ

تَلَاقَى إِلَيَّ مَرْقَعُ جِلْدِهِ قَبْلَ التَّوْبِ

إِذَا طَالَ الطَّعَامُ يَلْهُطُ

وَلَا يَفُوتُ

وَبِأَشَاوِيهِ يَخَافُ دَائِمًا

يَلْخَبُطُ لَوْ طَعَامُ جَالِهِ

وَيَغْلُطُ يَنْبَدِلُ حَالُهُ

إِذَا عَيَّى إِلَيَّ نَفْسُهُ فِيهِ

تَمْلِي تَلْتَقِيهِ يَهْرَبُ مِنَ الْأَصْنَافِ

تَمْلِي يَخَافُ

وَيَجْسُدُ فِإِلَيَّ مَشَى عَائِلِ

يَجِيبُ عَيْشَ حَافٍ

واهو ربك مقسمها  
يا ريتنا له نسلمها  
وجوه الحرب نتقدم كما الفرسان  
وأى جبان  
نقوله غور  
ونبدر جوه أراضينا  
بذور شجعان  
لا توهمنا حرير  
ولا ريش النعام  
بيشيلها لما تنام  
ولا ترضى تكون فى بعثة الخُدام  
.....

ياريتنا ناكل اللقمه  
بألف حساب  
ما نبلعها ولا تعدى  
إذا ما كنا ليها صحاب

دفعنا فيها وعرقنا  
ولا مره خطفناها  
ولا كلناها وشرقنا  
غرقنا لما فُتِنَا الكُل يسرقنا  
ساحنا الباشا ويا البيه  
وقطّعنا أيادي خداهين بيتنا  
لا بد الحد ، يصبح رد  
ويصلح فينا ما فينا  
وساعتها  
إذا قُلْنَا  
ودان الكل تسمعنا  
وساعتها تصدقنا  
نعيش فرسان  
نموت فرسان  
يحيننا يفتخر بينا  
أكيد رمضان.

فوق الكتاف  
دائما حمول وحمول  
يا بالى يا مشغول  
فى كل صبح وليل  
طافح خلاص الكيل  
لاكن لابد أشيل  
واعبى ف المواويل  
وامشى جمل  
ما ينخ طول السفر  
يطوى طريق الألف ميل  
.. .. ..

مكتوب على الصوم  
إن كنت بدى أوصل  
أعدى فوق الشوك  
وم الملل أرحل  
واسكن مساكن صبر  
وادعى ف صلاة الفجر  
لكل من شلته  
ولسه بيه ماشيه  
لا كن ما وصلته  
صايحه عشان أدّيه  
وابدر له نبضاتى  
واتمنى لو تكفيه  
صايحه وعاشقه الصوم  
مش بس ثلاثين يوم  
وبدى أفطر زقططه ساكنه  
جوّه عيون الكل

بدى فى لحظه اطل  
ألقى الفرح أشكال  
ما يحزنوش موال  
أقول كفايه صيام  
واشبع من الفرحه.

(إلى ذلك الإنسان الذى أعلن عن طريق  
الإنترنت استعداداه المطلق لبيع إبداعه من  
كل أنواع الأدب لمن يمكنه أن يدفع الثمن  
ويشترى ...)

### (١) الفِذِيه

باع الإبداع  
من كُتِر ما جاع  
من بعد ما وطنه الحر  
بقى مَلِكُه الطماع  
وصبح فى ضياع  
من بعد البصره ما طفت النور  
واتكتف دجله بحبل الأسر  
من بعد الحال ما صبح ما يُسر  
من بعد ما جه رمضان



ولا جاش العيد  
وانهدر الدم  
ومدافن متعبيه جيوش  
وجيوش الظالم مش لاقيه اللي يحوش  
حلفوا ما يمشوش  
ولا يطلقوا دجله  
جل ما يروى عطش الأرض  
فى لعبة جوز  
واللا فرد  
إنسرق الحق  
ولإمته مش حنقيم الحد  
ونبطل لطم  
اهم بيركب فوق اهم  
ويفقس هم  
وبيلس هم  
وان صام ييشق الريق

(٨٩)

بتمور هم  
لو هدر الدم  
لو قص لسان الحق  
وحكم ع النور بالشنق  
وبراءة صوت الأطفال بالرجم  
الظالم ما يهتم  
لو باع النبض  
أبيات الشعر  
لو دمع النبض يفر  
لا كن يهتم  
لو صوت النبض  
بيخالف أمر  
ويجبله صدا ع  
وإن كان السيف ف إدين الظلم  
إفديه تكون الدم  
إفديه تكون الدم.  
(٩٠)

## (٢) منادی بینادی

منادی بینادی

مین یشتری نبضی

إللی بیجری فی عروق قلمی

ویحط فوق صفحات ، متلونة حکایات ،

مبدورة بالدمعات

یاللی حتدفع هات ، واشتری همی

سامحینی یا أمی ..

لو شوفتی إسمی وسط من باعوا

وسط من ضاعوا ، وسط من جاعوا .. ..

طول عمری أنحت فی حروف إسمی

والیوم باهدنّ التّحت

عافرت لجل بنایا ماینهد

عافرت لجل طریقی ماینسد

عافرت ماقصّرت

لکنی یامّا ، للنجوم مارصلت (٩١)

ولارسيت بمركى ع الشط  
نَحَتْ يامًا حروف إسمي  
ولما جوعت ، ماسد جوعى التَحَتْ  
يَامًا اشتريت بالنبض والعُمر اللى فر  
وأهى كَفَى طابقه ع القلم، والقلم يقول :  
(إللى باقيلى أطلب الصدقات ، واتلقى  
بكفوفى ، إللى يسد الجوع ، واستنى شهر  
الصوم واتقبل الحسنات ، واقعد مع نفسى  
واغرق فى بحر دموع .)  
ماغدت طابق صوت غناوى الصبر  
ولاغدت اسلم دمعى للمناديل  
متلخطة كل الصور ف عيونى بعد الجوع  
متبرجلة عقول الحروف ، ..  
قلمى اللى كان ملهوف ، يقتل بصوته  
الخوف ،

إئدس وسط الصفوف  
(٩٢)

ينادى ع اللى يشتري مِنْهُ  
ويقبضُهُ  
لُقمه وتوب ستار  
هزتنا أصوات التعالب والديابه  
وانْقَصْ جَوَّانا ، لِسَانُ الحق  
واتسلسلت أحلامنا فى غمضة  
واتقدمت للشئق  
يانبض يامنقوش  
على تراب مفروش  
داسُهُ قدم ، كل إالى ماشافهوش  
اللوم حدف نَفْسُهُ  
فى حُضْنى من يأسُهُ  
وانا قولتله يالوم ، قول للى مايعرف ،  
يالوم يصح النوم .

## إتسنت السكاكين

لما وقع ، كترت سكاكينه  
الله يعينه ، وما تنكسر عينه

.. .. .

الكل شاهد حتى لو ما شاف

من ربنا ما يخاف

واللعبه قلبت جد

لازم يقيموا الحد

ع اللى صبح مسكين

عين الشهادة الزور

ما تنفتح فى النور

والحد لو يسقط

مين اللى حقيقه

الحد ما يمشى

على سطر ويفوت سطر

الحد قطر ، يلم من خالف

ويسلمه ف آخر محطة عدل

واهو كل شيء ، بالعقل والبيه

ينقاس

والناس

مش كلها كالماس

واللى انكسر

مش كله يتصلح

ولا كله يتكهّن!!

قلب اللى شهدوا ، كان حجر صوان

قالوا : خِليصُ رمضان

والذنب جيعدّى

وصرخوا ياللا

فين جبال الشنق؟

إحنا ، حُماة الحق

والقاضي قلبه ، مال مع الشاهدين  
واللى وقع مسكين  
إتسنت السكاكين،  
وهو يصرُخ  
بس يسمع مين؟



## يوم الطين

مش كل الذكري أليمه  
ويحق غزق دفاترها  
وسيرتها ، لو حد فتحها بنقفلها  
مش كل الذكري  
ليها أنين  
ولا ليها حنين،  
ياخدنا ليوم الطين  
الذكري سفر  
مهما بتمر  
بتهل  
والدمع مطر

ساعة ما يفر  
بيزيد ما يقلّ،  
لو جوه القلب  
ذكرى من نبض الذنب!!  
والدمع يفارق عين الندمان  
علشان  
يغسل نبضات القلب  
واهى مهما الذكرى تنام  
بتصحصح فى رمضان، طالبه الغفران، م  
الرب  
وتدق كفوف  
نبض القلب  
على باب التوبه  
والقسمه المكتوبه  
ندعيلها تصبح خير  
ده النبض سفير

والفكر أسير  
والسر ف بير  
جوه قلب النبضات  
وإن جرّب يخرُج للطُرقات  
ما يصبح سرّ..  
واهو كله ينفوت ويمرُ  
الخير ، والشر  
وعلينا دائما نختار  
وان قر علينا الغير  
ما نشاركه مهما يُقر.

## المدارس

المدارس فيها ناس  
تشنق النور والحماس  
ساكنه برج الجهل وعاجبها السكّن  
المدارس إمتة حتفوق م المحن

.. .. ..

بنت أموره وفنانه بصحيح  
أبله الرسم اللى ترطن بالفصيح  
قتلت جواها نبض العبرى ..  
والولد إالى يدوب بالمريله  
قِصته أكبر دليل ع المهزله  
فى الفصاحه ما حد يقدر

يسبقه

خطه سبحانه اللى وهبه وثقه

فى الأدب مالوش مثيل

فى الشهادة ميت دليل

إنه راح يوصل

وربه يوفقه

بعد حبه اتغيرت واتبدلت

الفصول والأبلوات

أبله قائله تعالى من سكات

إنت لازم تنضرب

جل ما تعقدش فصلك

يبقى زيك زيهم

إختلافك عنهم

راح يكرههم فى كل المدرسه

إنت عندك من راعاك

بس هم ما عندهم إيه ذنبهم (١٠١)

والحالات ..

مش حنخلص مئها

أبله مشهوره بعصايا لجل كله يترعب

في الحضانه ، قبل سن المدرسه

طفل من رعبه الخرس

طفله تانيه اتعمت

واما سابت الحضانه فتحت

واما نام الطفل في حضن الملى قدرت

تفهمه ، وتطمئه ، وتعلمه

تاني إتحرك لسانه بالكلام

بعد ما أضرب لسانه ييجى عام

الخرس والتهتهه

راحوا دون رجعه ولسانه إدّى

للأيام تمام ... ..

لسه حتى الآن حكاوى في المدارس

قاتله

(١٠٢)

وان حضر رمضان  
تنام القافله  
والحكايه مش كفايه نعلى بالطوب لجل  
مانعلى البنا  
ده البنا انسان  
والبنا فنان  
والبنا ، إبتك وإبنى وبتتا  
والمدارس لو حتصبح بئنا شاطر  
تافى تزرع الانتماء  
النوارس راح تحط  
مع الشطوط الحره  
ولا يمكن مهاجر.

### غيره ونفاق

(بتحلف إنها ما تنام  
في ليله قبل ما تدعيلي وتصلي  
وانا أقول ليه أكذبها  
ما انا بادعي لكل الناس)  
لها قلبها الضلمه  
لو شافني رافعه الشعله  
تلقاه يتخنق  
تمدلي يايدها السلام  
وفي عنيتها الغضب  
ساعة ما إسمي ينكتب  
جوه الكتب  
تتمنى إسمي ينشط  
وانا قلبي بيهلل إذا قرا نصرها  
أسبق وأجرى واروح لها



واهديها نبضات الزهور  
نظرهما دائما ناطقه بعيون الحسد  
وانا بدى اداويها وباستغرب واقول  
القسمه والرزق وحاجات ياما  
الله مقسمهم بعدله وحكمته  
- لو نتعظ -

نرضى وتسعدنا تملئ رحمته  
ما اعرفش أضلّ قلبي أبدا زيتها  
مع إنها ،  
لو راح نفتش ، راح تلاقي عندها  
إلى ينور قلبها  
واللى يكي نبض مش ده ولاده  
إلى يكيه ليل نهار  
إزاي نذاكر لما يجي الإمتحان  
ولما يخلص ، نجري نحرق في الكتب  
والإمتحان ، رمضان  
(١٠٥)

واهى طول الشهر صايحه وقايحه  
ولا تترك صلاه  
وتملى تتحمل وواصله للرحم  
يندار بظهره الشهر تبدأ فى النشاط  
وعنيها ع اللى يسبقوا واتوقفوا  
وتملى بتخاصم علامات الرضا  
لاكن تدارى - لما تقدر - إالى جوه  
نضها  
واما تفوز  
ما تعترف  
تتمنى توب غيرها  
وتكره لبسها  
مع إنا ..  
لو قاسته  
تلقاه مجر جر منها.

## قصائد قصيره

### (١) شهر رمضان

مش كل صلاه

تتقاس بصلاة الفجر

ولا كل شهور العام

بجلالة هذا الشهر

.. ..

### (٢) مسحراتي

مسحراتي طبلتي ف يدَي

لا انا بارقصُ فرد

ولا ماشي بغازيه

يانادى ع النايين  
واصحح الصايين  
وطبلى ميراث  
ورثته من جدّى  
مسحراتى طبلى فى يدّى.

(٣) فوانيس

أنا كل ما بتضلم أرسم فوانيس  
وأنورها بشموس

(١٠٨)

#### (٤) لقمه بملح

ساعة أنياب الغربه ما تنهش في نبضاتك  
با تسحب واسمع صوت النبض ساعات  
واتعذب وياك

وانت بتتن

جوّه سلك التليفون

مستنى أذان المغرب

ولا عندك مدفع يضرب

ولا شاغلك تلفزيون

ومحضر لقمه بملح

أغرف لولادى واقوم

عشان افطر ، لقمه بملح.

## (٥) القمر

لما القمر بدّر  
أنا كنت مشغوله  
ما فضيت له ولا ليله  
وبعته للمواويل  
ولما إتأخر  
عمّلت هُليله  
وبعت له المراسيل ..

## (٦) حلو

باتمنى اقول : حلو  
وامسك ف إيدى فانوس  
وادفن شعورى البيض  
فى قُصه وضميره.

## دَقَّ الْمَطَرُ

دق المطر  
على بابي والشباك  
رجعني للعمر الجميل  
من قبل لبس المريله  
وانا باقاروح  
لما أُمي تقولِي إدَّقِي وتفردلي الغطا  
وانا تحته قطه مكرمشه ومزقطه  
ساعة ما أسمع خبطته  
أرُمي غطايا وانتفِضْ، ما يهمني  
البرد مهما يلفني  
ويسلِّط الكحه علىَّ تَهْدَنِي  
أنا أجرى قبل ما يختفى صَوْتُ المطر  
وافتح له شباكي وبابي وقلبي (١١١)

وعيون الأمل  
أفرد إدىّ عشان اسلم  
واضحك واقهقه لما اشوفها بتنفسل  
وشعري يشرب مهما يشرب  
ما يضايقني م الليل  
حتى ملابسي ، كنت نفسي تستحمي  
كلها  
وهي كان ما يهمها  
لاكين عزولي البرد بيغير م المطر  
يحسدنا لما يشوفنا تحته مزقططين  
أنا وشعري والملابس والشراب وصندلي  
تصرخلي أمي أترعب  
لما بيسكنها الغضب  
وتبتدي تعدل جميع اللي انقلب  
والكحه إالى البرد وصاها تزيد  
البرد ده قلبه حديد  
(١١٢)



إزاي ده كان بيحبني  
وهديته دايما جايها تهديني  
هو اللي علمني حروف الكره والخوف م  
الزمان أما المطر .. نبض الحنان  
وصوته ألحان الأمان  
ولما كان بيحي ويا الصوم وبيجيلي  
الفانوس  
ويعاكس الشمعه ويطفيها ساعات  
عُمري ما خاصمته ولا دبلت في وشي  
ضحكته  
هربت سنين العمر مني ما عرفتلهاش  
طريق  
هربت معاها فرحتي  
ساعة ما بيزورني المطر  
دلوقت لو شفته باقصر سيكتي  
وباستحيي لحد ما يمشي (١١٣)

وقبل ما تشرب ملابسی میته  
واهو غیته  
لو جه یسلم .. کفی بترد السلام  
وتنادی للمندیل یجففها قوام  
یقلقنی صوته لما اتام  
أجرى ألملم فی الغسیل لما سمعه  
واطمئن إن جمیع شبایکی ویبائی  
ساده ودانها  
مهما ینادیها عشان تفتح ما تسمعلوش  
کلام  
ولا تنسی لحظه وصیتی..  
[إیاک لو خبط وصحاکی المطر  
تجری تنادی لجل اخاصم فرشتی.]

## تمثيلية السلام

تمثيلات النهارده غيط لمون  
واللى عنده وقت دايما للتسالى  
لا يبالى  
لب، ترمس ، أو سودانى ، كان محمص،  
ولا حُصص ، أو زتون  
ناس كثير م الطيبين  
وقتهم رجليه تملّى مكسحين  
واللى وقته له جناحات النسور  
ما يهمه التمثيلية لو تغور  
وسط ده كله ساعات الصوت ييحدف لك  
كلام  
يبعت الكابوس يقاتلك فى المنام

(السلام)!!

تمثيلية السلام

إلْفَتَّوه جايب الصبيان وجاى  
يشربوا قهوه وشاى  
ويا كيك أوبسكويت  
والديحه راح نجهزها كمان  
والنعوش ويا الصوت  
خُذ ديارنا من زمن  
قولنا تارنا له تمن  
واما جاب لنا كلابه السعرانين  
رحنا واحنا  
فوق أيادينا الكفن  
بدنا يقبل يسامح، أو يصالح  
إخترع لنا السلام  
كل يوم له تمثيلية  
واحنا أصبحنا هفيه  
الديار خدما هديه  
واحنا أصبحنا شهود

ع العقود  
كل تمثليه له فيها البطوله  
واحنا كومبارس القضيه  
إختلفنا  
ما اعترفنا  
بالطمع ويا الخيانه  
واستلفنا  
كل خوفنا  
والنهارده  
الشجاعه مش معانا  
كل نصر  
شهر صومنا سجله،  
له طريق  
كان بيطلب الكفاح من أوله  
الكفاح دا إللى كان  
راح يحرر المكان

إلى داق دكس الغريب  
كتفوه ، سلسلوه ، جرموه  
جوه كل تمثيليه  
ضيعوا كل اللي لى  
حزنوا كل اللي بى  
يأس خايف من عيون المسئولين  
واللى بيحايى لجبان ولا لغريب  
أو فتوه  
راح يحيله برده هو  
يسرق اللي عنده جوّه  
بس لسه الدور ماجاش  
والفتوه  
كل شئ عنده ببلاش  
واحنا كل تمثيليه  
بتقابلنا ، وتقاتلنا  
نحلف إنه عيار وطاش

واننا ما فهمناها  
إلا بعد الإند ما ظهرت لنا.

## لا يصح إلا الصحيح

إمته كان اللي يغنى للعنب  
إلى شايلاه الغصون  
صوت عميل؟!  
الزمن ده فيه كتير  
مش قليل  
من عجائب الزمان  
إلى هب واللى دب  
له مكان  
واللى شايلا السلاح  
إلى واهب كل عمره للكفاح  
جل ما يهادى تراب أرضه الأمان



قالوا إنه عنده نقص في الأدب  
سَقَفُوا للى يغنى للعنب وللبلح  
حتى بعد ما انفضح  
والكلام، اللى مغطى : إنشرح  
لا يصح الا الصحيح  
والورق ما يبقاومش أى ريح  
والخراب غير العمار  
صوت بلابل النهار  
واللا تنهيق الحمار؟!  
أنكر الأصوات وقالها : ربنا.  
لا يصح الا الصحيح  
الطبيب يشفى الجريح  
واللى ربه متعّه بالحكمه والرأى الفصيح  
ينطلق ما ينخرس  
لقمه الأرزاق بتطفش لو صاحبها كان  
نجس  
(١٢١)

والزكاة قبل الصلاة  
والصيام يبدّل الحال اللى مال  
والجمال مهما تشيل  
ما ينفذ صبرها  
ما يغضب ضرها  
ما تنخ  
قبل ما توصل لآخر الطريق  
مهما يبطول الطريق  
مهما بيكون ف الطريق  
والضحيه دورها من بعد الدييح  
لا يصح إلا الصحيح  
لا يصح إلا الصحيح.

## العشاء الأخير

من خوفه من ربّه  
ما غواه شيطان بأى شئ عاجبه  
وقوّته ، دائما ضميره ،  
إللى بيحاسبه  
بيحب كل الناس  
لاكن قليل منهم  
إللى بيحبّه  
لأنه صادق ، لما ينكر ، إللى مش عاجبه  
والللى ما هُش عاجبه ، دائما فى كل مكان  
وكل فىن ، لما بيعتر فى أى شئ  
عاجبه

.. .. ..

دور عليه فنان  
(١٢٣)

كان بده يعتر في ملاك  
يصوره بريشته  
وعتر عليه ..  
والصوره .. قدام العشا  
رسمت عينيه  
لا كين شيطانه إتفرس  
كان بده ياخده للهجص  
تسئه وراه  
لحد ما خلاه ، يقع في الحيه ،  
ولا سماش عليه  
إنهدت القوه ماعاد ضميره يعترض  
أصحابه شلو يشبه اللو  
وطيور على أشكالها كل يوم دايمًا تقع  
إتغير اللون اللى كان  
من غير يقع  
واللى شيطانه شطره دايمًا يقع (١٢٤)

فى وسط موج البحر مش طایل شطوط  
واهو كل يوم من عمره بذنوبه يفوت  
وذنوب جديده واقفه صف كل يوم  
شيطانه إطمئن عليه  
بقى صورته منه لما بيطل بعينه  
لا ضمير مصحح حبله راح يكتفه  
ولا ميزان يحسب وراه وينصفه  
بص فى مرأته إترعب  
جوه المراه شاف شيطان بيخوفه  
هرب ونام  
وفى المنام  
شاف صورته قام  
نده شيطانه وقاله اهو إنت السبب  
سمع منادى يندهه  
فنان زمان  
عايز شيطان

دَوَّرَ سَأَلَ  
وَاهُوْجُهُ لَحْدَهُ وَادِيَهُ وَصَلَ  
أَخَذَهُ مَعَهُ  
وَرَسَمَهُ قَدَامَ الْعَشَا  
لَقَاهُ بِكَيْ بَحْرِ النَّدَمِ  
وَقَالَ لَهُ أَنَا  
مِنْ عُمْرَاتِ  
رَسَمْتَنِي هَذَا الْمَلَكُ  
لَأَنِّي صُمْتُ عَنْ الْحَرَامِ  
وَلَمَّا جَرَبْتُ وَفَطَرْتُ  
جَانِبَ الْهَلَاكِ.

مطعم الإعلام

مقام السيده .. صليت

وتانى قمت واتوضيت

ورزرت هنا الحسين .. ودعيت

ما جيتش عشان ادوق الفتة والمنبار

ولا احبش من الدكاكين

معايا ضيوف

حكولهم عنا كوم حكايات

بتنجلنا ونخزلنا

وفى الإعلام

فضايح جوه منازلنا

ما تتحلش ببحر دموع

ولا أكوام مناديلنا

وفى الإعلام

بينخر فى بذورنا السوس

وللسوس احنا سلمنا  
جميعا ، كلنا ضعنا  
نسينا الفرض وسكرنا  
فى عز الضهر فى رمضان  
أكلنا حق بعضينا  
شربنا دم بعضينا  
وزكينا  
بمال خدناه  
برقصه ولعب كوتشينه  
معاد العمره ما اتأخرنا وطلعنا  
ولما رجعنا جوه الديسكو هيصنا وغنينا  
معاد الحج ، حجينا  
ولما رجعنا فلّسنا البنوك ولبره هجّينا  
وفى الإعلام  
ما عادش العيب بيتكنسل  
ولا عاد الحرام يخزل  
(١٢٨)



وفيها الكل صار يقبل  
يطاطئ الرأس  
وإحنا لسنه بنفلفص  
وعُمر النور ما راح يطفى  
ويتنازل بقيت العمر للضلمه  
وعمر النجمه ما تنداس .. مادام نجمه  
عشان اللقمه والهدمه يكونوا حلال  
ما با قتلشي عشان المال  
وباجمع م الضيوف أشكال  
وازورهم  
أماكن لسنه ما اتوفتش  
ولا تاهت  
ورا ندهة الدنيا  
ولا بيعب يضايها وينصفها  
معاد في مطعم الإعلام.

مهرس المحتويات :-  
اقسام اعداد الطبعه / دس  
من ١ : ١٣

رقم الصفحة	إسم القصيدة	مسلسل
٥٠	فدائيہ	- ١٤
٥٥	الحكاية	- ١٥
٦٠	العُربہ فی رمضان	- ١٦
٦٣	هَمَّ الناس	- ١٧
٦٥	العقد	- ١٨
٦٨	تاريخ الهزيمة	- ١٩
٧٢	أما قولت !!!	- ٢٠
٧٥	ميلادك مش دموع شمعات	- ٢١
٧٨	ليلة القدر	- ٢٢
٨١	الكنافه والقطايف	- ٢٣
٨٥	عاشقه الصوم	- ٢٤
٨٨	الفدّية	- ٢٥
٩١	منادى بينادى	- ٢٦
٩٤	إتسنت السكاكين	- ٢٧

رقم الصفحة	إسم القصيدة	مسلسل
٩٧	يوم الطين	-٢٨
١٠٠	المدارس	-٢٩
١٠٤	غيره ونفاق	-٣٠
١٠٧	قصايد قصيره	-٣١
١١١	دق المطر	-٣٢
١١٥	تمثيلية السلام	-٣٣
١٢٠	لا يصح إلا الصحيح	-٣٤
١٢٣	العشا الأخير	-٣٥
١٢٧	مطعم الإعلام	-٣٦

## صدر للشاعرة :

### دواوين شعر:

- (١) شهرزاد - الهيئة المصرية العامة للكتاب ١٩٨٨
- (٢) عرايس الشعر (مشترك) - مديرية الثقافة بالإسكندرية ١٩٩٣
- (٣) ضفاير الشمس - الهيئة العامة لقصور الثقافة ١٩٩٦
- (٤) الرسائل - ط١ - مديرية الثقافة بالإسكندرية ١٩٩٦  
طبعة ثانية - هيئة الفنون والآداب ١٩٩٧
- (٥) كاس دموع واحد - إتحاد الكتاب المصرى ٢٠٠٢
- (٦) أناشيد البراءة - الهيئة العامة لقصور الثقافة ٢٠٠٧
- (٧) حبات الحروف - الهيئة المصرية العامة للكتاب ٢٠٠٧

### قصص للأطفال :

- (٨) الغابة النظيفة - طبعة ١ - دار المعارف ١٩٩٤
  - طبعة ٢ - دار المعارف ١٩٩٧
  - طبعة ٣ - دار المعارف ٢٠٠٢
  - (٩) مدرسة الغابة - الهيئة العامة لقصور الثقافة ١٩٩٦
- (١٣٣)

- (١٠) حكماء الغابة - حكمة الأسد - الشركة  
العربية للنشر والتوزيع ١٩٩٧
- (١١) حكمة النمر - الشركة العربية للنشر  
والتوزيع ١٩٩٧
- (١٢) حكمة الحصان - الشركة العربية للنشر  
والتوزيع ١٩٩٧
- (١٣) حكمة الفيل - الشركة العربية للنشر  
والتوزيع ١٩٩٧
- (١٤) حكمة الجمل - الشركة العربية للنشر  
والتوزيع ١٩٩٧
- (١٥) حكمة الدب - الشركة العربية للنشر  
والتوزيع ١٩٩٧
- (١٦) حكمة البقرة - الشركة العربية للنشر  
والتوزيع ١٩٩٧
- (١٧) حكمة الكلب - الشركة العربية للنشر  
والتوزيع ١٩٩٧
- (١٨) حكمة القرد - الشركة العربية للنشر  
والتوزيع ١٩٩٧
- (١٣٤)

رقم الإيداع: ٢٣١٥ / ٢٠٠٧  
I.S.B.N: 977 - 301 - 146 - 8

